

永平府志 (光緒) 七

永平府志卷三十六

建置志五 學校上

學宮

永平府儒學在治北百五十步明倫堂五間兩序東西齋各五間前爲儀門又前爲大門外東西兩坊創建年月莫考元延祐中總管府達魯花赤也孫禿至正中總管賈維貞明正統中知府李文定天順中知府周晟成化中知府王璽王問宏治中知府吳傑正德中知府何詔唐夔嘉靖中知府李遜隆慶中兵備沈應乾知府劉庠萬曆中兵備宋守約知府辛應乾張

世烈徐準皆修葺 國朝順治中副使宋琬知府楊
呈彩康熙六年知府李興元十六年知府常文魁三
十六年知府梁世勳郡丞彭爾年四十八年知府張
朝琮乾隆二十八年知府七十四三十八年知府李
奉翰嘉慶十七年通永道任烜知府韓文倚道光元
年知府秦沆咸豐十一年知府范梁同治十一年知
府游智開皆重修

先師廟在明倫堂西正殿五間兩廡各五間前露臺戟門
又前泮橋左右碑亭前櫺星門

崇聖祠在廟左

名宦祠鄉賢祠在戟門左右

敬一亭在廟西久廢

教授署舊在明倫堂後有號舍兩楹俱廢康熙三十二年教授徐麟詳請借居北平書院在文廟前今廢書院爲學署

訓導署三所在明倫堂左 國初廢借居武學右舍康熙三十七年訓導徐香修建乾隆二十八年教授楊宸訓導崔鶴儀仍改建於舊處

武學在府治南舊守備廳地明隆慶六年知府辛應乾建今改爲敬勝書院

遼學順治二年因遼生散居關內 題設至十二年裁

官歸併府學代理今裁

順天督學吳國對重修永平府文廟記云北平負山帶海稱燕冀神皋屹然一大都會也考古爲用兵之地漢太守李廣以神勇著下此兵興之事史不絕書今天下中外一統人民樂業聖天子右文崇道宏獎儒術多士蒸蒸向風漸摩於道德仁義陶淑於禮樂詩書蓋三十餘年於茲矣比年以來水旱頻仍稍稍失所太守三韓常公甫下車卽徧訪利弊問民疾苦閭閻瘡痍引爲己疚其間釐剔振興有關民生者善政不一而足乃先爲謁文廟而慨然曰今天下豈弟作人惟此爲興賢育才之地士子朝於斯夕於斯誦法景行而顧令廟貌之頽圯闕物弗章其何以尊聖教而勵儒修也然當此十室九空之際下竭民力腴民財以傷吾休養百姓之意則大不忍爰是捐俸庀材給貲鳩工經始於康熙十六年正月望日落成於十一月朔日殿庭巍巍廊廡蕤蕤我輝煌璀璨煥然一新於前另建書院其中大庭三楹左右環以號房十

二間庭後正房五間東西廂房四間爲諸生修息之所庭前設照壁坊表以界內外大門與周而牆垣及廚爨等室以供諸生月課肄業又前此未有余以試事至謁拜畢進諸生而勸之曰爾知二千石葺廟意乎爾俗剛武雄悍思以柔之狙詐剽黠思以誠之其或輕浮躁淺董之而進於莊鄙樸固陋飾之而澤於雅非聖道不爲功是故他務未遑而汲汲於此吾於此而知太守之能重文也能敷教也能體
子豈弟作人之意而以興賢育才爲首務也能以先師之道德仁義禮樂詩書漸摩陶淑於斯民而令父兄之教必先子弟之率必謹其用心厚而嘉惠於爾多士與斯民甚深且至也異日考多士之蔚興大則棟梁舟楫爲邦家光次亦孝弟忠信篤尊君親親之誼化行俗美比戶可風自賢郡守始之而成之矣推此以治一郡而一郡理以治天下而天下理而猶慮文教不敷太平不可坐致也又誰信其然哉余顧而樂之遂援筆而爲之記始其事者卽太守常君文魁因其事而共勦則郡司馬鄭君四國州守欒州馬如龍縣尹盧龍呂憲武遷安張一鶚撫甯劉馨昌黎陳邦齊樂亭于成龍永平衛守備杜進梅山海衛守備

學校上

王天福至督修生員

楊新鼎例得並書

左都御史遷安劉鴻儒重修永平府學宮碑記云教化者制治之本也學校者教化之原也苟使在位者由學校起教化由教化得制治能令人文蔚起喁喁向風卽龔渤海趙京兆當俯而遜謝之况學宮嚴地先聖先賢巍示之所博士弟子員講肄之區郡守邑宰諸公瞻侍之域而顧與荒煙叢草敗址朽楹日相尋而莫爲革整當亦昇平之世所最憾也北平爲畿東名勝之處山水滌帶先賢墨胎氏焜耀千古其間文人粹士接踵歷代而建學於城西北隅規宏而制偉數十年以來兵燹洊加榛莽之所蒙塞荆棘於焉蘊崇遂至殿廡堂奧之闢椽毀而瓦遷守令諸公若與我絕不相屬者會我公祖常公守茲邦綰綬之始卽汲汲以整理學宮爲己任進屬吏鄉士大夫而咨之咸樂輸恐後鳩工庀材度越前人拆正殿而新之輟彝堂而構焉一椽一礎變腐爲燦棟宇節稅麗若妍明門之外有兩坊芟其朽而更奠之易柱以示別坊之內有木柵改以石垂爲可久鏤破蕃穢環以松翠森蔚周而望之巍然倚歟盛哉余於是服公祖之

知治要而崇先務也夫梵宇道院所在居多名勝地
郡邑大者百餘所小者亦數十所商賈婦子願施而
不倦莫不塗朱堊碧照耀瞻眎獨至於學宮每郡邑
僅處其一兵興以來大半鞠爲茂草頽垣破壁先聖
先賢棲於烈風淫雨之下而莫之或卹問師儒而師
儒無其權問文宗而文宗無其意是正學彝統反不
若二氏足炫愚罔也惟我公祖常公以文章理學表
爲經濟能使墨吏解綬豪氏怵息而敦崇大體首力
學宮上以承 朝廷崇儒右文之至意下以鼓士子
讀古明道之深心前以接昔聖昔賢茫茫未絕之統
緒後以啟十數百年十數百處遙遙無盡之人材雖
華縟而不以爲侈雖煩重而不以爲勞致泮林闕宮
之盛再見於今日再見於此邦雖古名公卿孰能絜
隆於公祖也哉夫天下者郡國之積也郡國者州邑
之積也使撫茲六屬曉然知公意指之所在則先其
教化後其刑罰者擊蒞廓蒙學者歸嚮率鄉曲之原
慤者羣而敦詩書明正誼力田孝悌之風爭自濯磨
民有不畏桁楊而畏清議不矜智勇而矜名檢者矣
昔文翁爲蜀太守置學宮數十區以教養士子而蜀
文彬彬始盛何武爲刺史行部必先至學宮而後至

傳舍古今賢太守其識同力同而經緯亦同也余遊
學宮睇觀焉既有慨於昔因有快於今快於今故記
之記之以風天下之凡
為郡守如我公祖者

知府范梁重修廟學碑記云永平為畿東劇郡我

朝二百餘年來人文蔚起崇禮讓敦氣節駸駸乎有
齊魯風是固山水靈秀之氣之所毓鍾而要由沐浴

聖澤陶泳涵育於庠校之中者之深且厚也郡

學在城西北隅規制宏敞七邑之所瞻仰歲科試遵

玉豐諸生咸於此觀禮焉歷年既久日漸傾圮咸豐

丁巳前學使李公案臨亟謀修葺捐廉以倡諭各州

縣學官生童集指以成之僅新東西兩廡於時董其

役者為郡紳士王維凝王國柱辛酉春前學使楊公

以明倫堂僅存基址復捐廉議修委其責於前守博

公未幾博公卸事去梁奉簡命於其夏來守是

邦下車展謁慨然思所以成楊李二公之志願以為

工鉅而需費多也乃以書院存典息銀七百餘兩益

之又昌黎楊生肇第捐銀四百兩遂仍俾兩王紳董

其役經始於是歲秋因其舊制而新之先之以

成殿崇聖祠明倫堂次則戟門櫺星門又次則鄉

賢名宦祠其餘若階若庭若池若坊若門若垣罔不
畢治越次年壬戌冬遂觀成焉巍巍翼翼其足以妥
先師之靈矣乎先是勘工約需銀四千餘兩今止
用銀一千五百兩有奇工俱堅緻可永久良由兩王
紳善區畫舊材可用者用之捐資或未集王紳維疑
先爲籌墊以佐之是以費不濫而工速成也顧梁聞
之教化者所以維人心厚風俗以相持於不敝者也
學校者所以爲教之地也頽廢而不修荒蕪而不治
不特無以稱長者之責其何以副國家養士之心
乎是役也兩學使聞其先又賴諸生捐資集事書院
息銀固生童膏火之需猶是生童之捐資也盧龍縣
郝教諭錫章袁經歷守直實經理其事襄事者爲府
學梁教授鳳翰于訓導士祺縣學廉訓導百齡工既
竣會梁奉檄調首郡瀕行爲文泐石用誌歲月云同
治元年
十月

盧龍縣儒學在郡城東南隅縣治之前明倫堂三閒前
有捲棚前爲儀門又前爲大門明洪武二年建知縣

胡昺經始正統間巡按御史李奎魏林徐宣相繼捐
修景泰閒知縣胡琮重修天順閒圮于水教諭李倫
重修成化閒教諭徐潤等更拓之宏治閒知縣李景
華吳杲知府吳傑增建號舍今廢嘉靖閒府同知張守
知縣王大猷吳道南楊保慶隆慶閒知縣潘愚重修
萬曆十五年又爲水圮兵備葉夢熊知府孫維城推
官沈之吟知縣王袞王象恆天啟中孫止孝崇正中
張煊皆重修崇正十五年爲颶風所拔 國朝順治
中知縣梁應元趙汲康熙閒知縣閔峻相繼重修十
年淫雨傾側知縣魏師段呂憲武教諭朱持正知縣

衛立鼎陳夢熊重修四十八年大水坍塌知縣晏賓
教諭胡仁濟修葺乾隆三十六年教諭丁廷輔訓導
田雲青重修明倫堂

先師廟舊在明倫堂前規制卑狹嘉靖四十五年兵備道
沈應乾遷於學左正殿五間東西廡各五間前戟門
泮池又前爲櫺星門櫺星門之南建坊二其東西臨
街建坊各一今廢

崇聖祠舊在敬一亭西後改建東北隅
名宦祠鄉賢祠在戟門左右

敬一亭在廟後今廢

教諭署在明倫堂後

訓導署在明倫堂西舊廢訓導王拱辰復建

饌廳在堂左廢

學倉在堂右廢

明御史邑人韓應庚盧龍重修廟學記云我國家遠稽隆古建學立師內而兩都外而郡邑莫不有學蓋造士作人則膠序黨庠不厭其詳意甚盛也是以二百年來文武聿興卽黎獻共臣思皇濟濟何以加茲盧龍爲永平附郭自洪武已酉肇建學宮萬厯丁亥爲霖潦所鬻土木頽圯丹雘剝蝕累朝之隆構幾且蕩然知府事東郡孫公上專於諸臺報可以公帑之羨三百金檄邑令白君董其役經始於己丑之七月迄庚寅之四月告成學諭劉君元卿訓李君允恭周君道率弟子員劉禮等造不佞請曰昔魯作泮宮鄭修鄉校學士至今誦之勿絕今茲學鼎新春秋釋菜青衿士俱得羣居敎業是郡邑大夫之大有造於斯

也願乞一言以紀其事余惟校教也序射也教與射而並稱則文武兼資非儒者之所有事乎而謂學事務文者非通方之論矣平盧古幽州之域東抗遼海西枕居庸四塞莽蒼蓋用武之國也方高皇帝創業□定欲偃武修文故惟興學爲兢兢今海宇恬熙忘戰日久時當經文而緯武要講折衝於樽俎蓋事期有用交事武備缺一不可孔子於衛嘗任俎豆而辭軍旅矣他日乃曰我戰則必克至夾谷之會以好往而具三司馬以從卒奪萊夷之魄於壇坫之間而疆自闢其時射於矍相之圃則命子路延射而曰敗軍之將無入此其養之者裕而其應之者壯以暇也今統其所教子弟卽粗而名之曰文武吉甫萬邦爲憲諸士誦法孔子佩服仁義其無廢韜鈴異日者身都將相出其深略壯猷可以緩內治亦可以折外侮使天下稱之曰丈夫也實有其文武焉卽以憲萬邦何有哉斯無負於國家建學養士之意而郡邑大夫之是舉也信乎其有大造矣夫孫公諱維武辛未進士山東北縣人白君諱希顏丙子貢士山西平鹵人國朝知縣呂憲武重修盧龍縣學記云盧龍爲北平附郭另設學宮專祀先聖所以仰法古帝王之盛典儲

育此一邑之人才也考諸碑記創立於元未盛建於明初規模制度與郡國學宮無異其歷代增修已載於他碑茲不並列迨明季崇正壬子歲夏月巽二肆威聖殿彝堂隨風飄沒豈非地運逢屯宮牆一厄也哉然而聖牌高拱大風雷雨弗移泥沙瓦礫弗污金砾儼然觀者咸肅然起敬說者謂聖賢有靈厭故宮之污萊假此天風掃蕩數百年之塵垢以俟後起者之再為維新者耶以禮陶樂淑之地候而為荒煙瓦礫之場一時官師弟子員瞻仰無地乃捐募售買民房重修殿廡門祠制稱粗備僅蔽風雨而已適會皇清定鼎燕都首崇文教順治丙戌重修於梁公應元戊子歲再修於錦州趙公汲斯時明倫堂以及門壁方始就焉康熙戊申又重修於烏程閔公峻而閔公旋行取入都矣余於甲寅歲筮得盧龍令將佩符東行適閱公會余於京邸注意盧庠悉言盧庠興廢之故以歷代創造之宏規忽為天風之飄沒雖經草創以重修終不若古制之周備向曾捐俸重修奈規模宏敞無能徧及欲立石以記歲月且勸同志於將來屬余代為立石以誌之余於是歲之仲秋抵盧蒞事謁廟間見學制宏闊雖經數次重修闕者猶然未備

以萬乘崇祀之香火而一邑小吏經營何異蝨負泰山乎余家東海之濱去聖人之居不遠遙憶尼山秀氣闕里鴻規值此景象豈可以祀先聖耶余亦景仰前哲乘時修葺恐費繁之莫繼付託之無人時拳拳於念切切於心戊午春大興朱君持正來諭盧庠謁聖時首以修學爲請余與之謀畫顛末志同道合與有同心焉余卽爲捐資首創設以簿籍示其專也鈐以印信示其公也仍令該房鄉耆勸助於闔邑紳士商民之尙義者一時金錢集濟朱君先勞無倦慨然自任李生廷蕃協贊勸董卽覓匠鳩工經營指點易其頹朽整其剝落繕補其竇漏再造其傾圮增添聖位中龕以肅威儀更制哲臺閣以順位次補全先賢先儒之木主重葺泮橋壁水之曲欄櫺星坊前新築品牆以期堅久設以柵欄以嚴內外經始仲春畢功仲夏凡三閱月宮牆改色殿廡增新雖非徹地重新之修造卽此補修補造之工程殿廡祠坊堂廈門牆可期經久而不壞也余進朱君李生而勞之曰此番修造既無虛糜之費修葺又得實濟成始成終無曠無冒余與共事諸君俱有厚幸焉何者余有修學之盛懷弗遇朱君可託之人則何由謀其初朱君有